

潞安府志

第三十二卷

地 160.39  
134  
118  
部 =

册八十





潞安府志卷三十二

藝文續編四

明

記

潞城縣嘉禾記

鍾

紹王  
教授

一日潞城庠生馬璣偕耆士申復振謁予告曰潞州所屬六邑潞城其一也成化戊子秋潞州及潞城郊關之外東阡西陌而禾之生或一莖六七穗者或一莖八九穗者芄芄穰穰異畝同穎髦耄髻鬣舉欣欣然有喜色而相告曰是嘉禾也乃上天和氣所結世不常有何獨

潞安府志

卷三十二

藝文續

一

于潞州及潞城哉想必吾邦守令之賢仁政感召耳於是各爭相集趨日以千數拜於庭下曰民被侯之深仁厚澤咸得以樂生業于畝畝今上天致此續祥之應又何幸躬逢其盛焉侯喜而慰之曰予宰是邦德未能修諸已才未能達諸用夙夜惶懼職弗克稱有何善足以動天而昇此嘉禾耶是蓋上有堯舜之君下有堯舜之民上天福吾民享太平之樂躋仁壽之域豈偶然哉民有復之者曰潞州屬六邑不過三四百里而嘉禾不產于他實由賢侯仁政感召何疑之有吾民敢不謀立貞珉以紀其盛於永久且潞州嘗記之矣今吾民再先





一言以紀潞城之盛以彰杜侯之美幸毋靳焉夫嘉禾  
穀得時之中木旺而生故始生于春金旺而死故熟于  
秋必得上天雨露以滋培之雷霆以鼓之然後能實穎  
實粒今其生也連莖合穎視他處之獲十倍八九詎非  
邑令之賢臻此乎杜公諱彪爲大名魏縣人由鄉貢入  
太學擢令是邑秉心以公持身以正凡民利所當興者  
興之民弊所當革者革之仁洽而義易禮達而分定頌  
聲載道譽績增崇宜天以嘉禾惠其民昔魏許謙守鷹  
門而三生嘉禾漢張堪守漁陽而麥秀兩岐以至產于  
魯恭之庭得於唐叔之畝皆由數君子修德行政以感  
潞安府志

卷三十二

藝文續

二

召之耳今杜公之在潞城德政日聞于朝惠澤日施于  
民可謂當時賢令矣豈不足以召嘉禾之祥而與古之  
守令齊驅並駕哉予特述潞民頌禱願望之辭以爲之  
記俾歸而刻諸石以爲來者勸云

重生嘉禾記

屈銓 邑人

昔成化四年戊子秋潞城境內凡東鄰南畝下隰平原  
嘉禾之生一莖七穎者有焉一本九穗者有焉是時大  
尹魏邑杜侯監春秋不書之旨不敢以爲嘉瑞而獻之  
亦弗敢以抑人情而闕之曲徇耆老之請鐫石邑庭以  
紀其歲月云爾越六年庚寅歲輿圖之廣若郡若邑亢



陽爲戾旁亘千里而潞城獨有時雨之濡凡藩憲守今  
大小羣僚俱以旱災之由十去二三而杜侯獨蒙褒獎  
之異迨是歲西成而嘉禾之生復如前歲耆老會集相  
與採諸郊畝拜而獻之杜侯曰嘻是穀也穎粟蕃碩固  
云嘉矣得非取諸他邑而誑我乎耆老荅曰厥穗之七  
而一莖者則生於某所之田也厥穎之九而一本者則  
產於某所之隴也尙多有之非止此耳侯拱手而言曰  
予樂泮宮之化登虎榜之列濫竽斯邑已七年于茲夙  
夜矜惶懼不能勝是何瑞應而復生于此耶茲蓋幸遇  
聖神功化之極公卿篤棊之至經文緯武而熙洽之治  
潞安府志

卷三十二

藝文續

三

成體信達順而中和之氣應其禎祥之應久矣奚翹茲  
禾哉言未畢民有應于下者曰昔周公獲歸禾之命張  
堪得麥秀之謠孟鄴有九穗之異故人君得其人守令  
善其政嘉穀正祥各隨其地而生和氣之應豈有間哉  
唯我侯律身清介涖職忠勤視財如土潔而不求視民  
如赤子而不苛五事变修三異並集真不負皇朝惠牧  
元元之意是以嘉穀休祥之應不在他邑而獨鍾于此  
也宜刊諸堅珉以紀盛美侯曰予惟愧德無實惠以及  
民苟以爲記又曷克以當其盛乎耆民復曰侯之職在  
治民事神而已今侯之營繕城隍之廟皆勸資以爲費



就力以興工而閭閻之民初無絲毫之擾至於興利除弊以鼓舞斯民皆可以對越神明而無纖芥之舛謬也是以冥冥之中假諸草木之靈產于仁風之地以彰其善耳杜侯猶以爲偶然而未之許也愚謂效忠者不闕于陰陽之委和盡節者不匿乎天地之委順今嘉禾生于野人情效於下苟坐視美瑞而不以爲記將使史無以傳信誌無以錄實而後之人終不得見太平之盛美其于人臣載筆之義何如哉杜侯感余斯言因紀述其事以爲補報之萬一云

襄垣廟學增建神祠書舍記

屈

鉉

潞城人

潞安府志

卷三十二

藝文續

四

聖明大闡文教天下郡邑學堂齋舍之屬莫不全具所以作人材重風化也襄垣儒庠湫隘曠久巋然而存者惟明倫堂東西二齋而已成化庚寅八月三原張侯曉以進士出宰是邑下車伊始興利除弊百度惟新至於興學勸賢尤拳拳而加之意先聖廟宇密邇於學廟東有地一區自兵興來據於豪強張侯朔望謁廟躬學之暇見是缺然召彼居民諭以遷退之宜民亦樂從無敢違忤旣獲其地卽命工經理其事前畫文昌祠三楹後營書舍十有六楹區分丈列度其靡費非銖兩之微可得而就也侯乃捐俸自倡以爲營構之費因人樂輸以



充備遺之資是以材木輻輳而無利徂之擾工傭立辦而無洒派之煩輪奐甃甃聖塑煥然而大備吁地蝕十餘世而開之于一旦官經百餘輩而剏之子一時豈非興廢有時而千載一遇乎是以刊諸堅珉以紀歲月云

屯留縣鐘鼓樓記

劉健

中原之地山西最高潞州當太行之巔居天下之脊尤非他州比故郡名上黨屯留其屬縣也本名純留其地在群山之中險狹且磽薄民田作勤一歲所得不及他郡之半故其土俗自古號純儉其勢然也凡附山之縣民居皆蕭疎而城郭亦荒陋不治我皇明都金陵藩治

潞安府志

卷三十一

藝文續

五

當其北屯留遂爲要路將命之使及商賈往來必經之故民居鱗次以千數視傍縣差盛焉人煙旣繁城居治署不得不完固壯麗亦其勢也然自國初至於今日餘百年矣縣治之門尤卑隘不稱與編戶之室等而又無鐘鼓之設以司刻漏節昏曉居民及商賈往來者皆不便焉且聞縣舊有一鐘甚巨置他所不用蓋知前此吏於縣者亦嘗有意興作而未遑也慶陽王君縉卿以進士來爲是縣尹逾年政通民悅歲且大熟因會諸僚佐及吏民告以興作之謀僉以爲宜遂鳩工聚材築臺於縣治之前而門其下其上則作樓三楹左置鼓右取巨



鐘而懸之謂之鐘鼓樓成化乙未秋始事至丙申之夏  
凡四閱時乃卒功崇墉復宇旣壯且固凡縣之政令教  
條於是出納吏民賓客於是馳走遵施一縣而不  
失程度焉至於昏曉之際伐鼓聲鐘以嚴刻漏又足以  
警動民之觀聽而時其作息之節百年之缺典一朝而  
舉且其工費之周裁處皆有道雖用民力而民不告勞  
焉古人所謂以佚道使民雖勞而不怨者是役近之矣  
縣之士大夫及往來商賈推誦王君之功皆謂宜刻石  
以傳永遠余從子襄適爲縣學訓導來走書請余爲記  
而王君之登第也以成化壬辰余在考校之列且有斯

潞安府志

卷三十二

藝文續

六

文之職不得而辭遂爲次第其可言者使歸刻之

潞城縣修廟學記

屈銓

潞城縣廟學建置久矣國朝洪武二年知縣張壁重修  
之第以民附未久工料未備以故殿廡門墻不過苟完  
未至于閎高壯麗也歷年旣多日就傾圯繼而官者往  
往視爲末務漫不加意有欲修者又且財力不逮至成  
化十二年春知縣張公以名進上來蒞是邑下車之初  
首謁文廟顧瞻谷嗟色不豫甚及升明倫堂教諭魏燧  
等進曰斯學匪直文廟敝壞其故地狹隘原無會饌堂  
東西號也公廼颺言嘆曰文廟乃聖賢棲集之地學校



乃師生授受之所今廢墜若此舉而修之吾分內事也苟坐視不理自暇自逸得矣如分內事何于是詢之僚佐鳩工聚材伐石陶甃捐俸廩以倡乎下勸殷富以助其資僦閒民以供其役而不費公帑不傷民財不違農時也經始于成化十四年春撤其舊而一新之且舊殿止三楹舊廡東西十二楹時則殿增五楹廡增至二十四楹俱覆以琉璃金碧輝映櫺星門之與戟門仍舊基重修之文昌祠之與饌號開新基而創建之若庖厨庫舍亦莫不以次而完備焉制度之工巧品式之精研類皆出于公之籌畫而後定越成化十六年秋遙觀厥成

潞安府志

卷三十二

藝文續

七

以今視昔殿廡門牆增卑以高易隘以爽壇雖魯僖之泮宮亦復何以加哉于是教諭孔儀等睹此偉績徵余爲文用垂永久余固辭弗獲竊惟廟學者道脉人材之所關也肆我國家列聖相承惓惓崇重者爲斯故也儼而不修者固不足道今廟修之則行其禮奏其樂有以妥先聖之靈而道脉爲之潛回學修之則誦其詩讀其書有以遂師生之意而人才爲之丕振則公之重修廟學之心亦盡外于此耶若夫徒爲觀美而弗足以受神而造士誠非公之本心也大聖人之道天施其次日月其明古今其悠久固無庸贊一辭及夫配享十哲



祀諸賢皆註書立言開來繼往有功於聖門有功于天下後世者抑豈容贅言哉但學校居有司六事之首今克修舉如此則于朝廷崇儒重道建學育才之意無所愧負而其職無所不盡可知矣惡乎其不書公諱璟宇廷璧河南臨漳人登乙未進士其爲政也清慎勤能嚴明惠愛吏畏民懷卓卓動人耳目其他壇壝舖舍城池倉庫司館鎮店亦無處弗舉詎止廟學之修而已哉至若相協厥事則有縣丞汜水陳永清商水王睿主簿華陰王相慶雲徐鑑典史齊東閻冲教諭武功魏壘通渭孔儀訓導鈞州張福沔池謝惠例得並書焉

潞安府志

卷三十二

藝文續

八

潞城縣重修城隍廟記

屈銓

歲律和調本神功之宏化星樓爽塏由循宰之雄才大尹張侯項城望胄早登金榜卓冠瓊林暫淹經濟之才俯任嬰城之邑下車伊始謁廟攄誠適見三門圯隳遂使百廢更新廼捐俸資力圖肇建富者因上率而輸財嗇者亦感化以傾橐隨邑僦工不假刑威之迫子來効力更無苛譴之煩肇役于敦牂元枵之初落成于協洽青陽之季役不愆期何期至歟張侯上奉朝綱下承神惠一盂湛水六事明霜剛不佩葺而學餒春融柔不佩茲而克強隱伏鈞廈訊匿之若電發奸摘伏之如神夫



皆善政昭合神明者也是爲記

長子令孫君去思碑

阮勤 邑人

邑父老詣余曰前令尹孫君宏治辛亥秋來宰邑事適政弊民困之餘君至清儉自處門無私謁剷革積弊務圖利安弛張適宜勞來不倦未期年逋亡來歸君指畫耕具穀畜之本人人給之遇歲荒勸粟二萬餘計口周貸民悉全活舊徭役無條率富逸貧勞君酌量貲力爲役輕重而民得其平舊催徵不時逮上司督責遂迫民轉徙君則省民以時寬限徵完民遂其生境內間有爲厲民者則明罰以法不少姑息民服而刁頑逆迹西山

潞安府志

卷三十二

藝文續

九

忽有羣盜君則築城濬池振威遠邇盜散而閭里以寧其他善政難以計數泣政三載丁艱而去民思之如失父母欲立石以傳永久宋劉絢知吾邑督公家逋賦不假鞭朴而集歲大旱府遣吏視災報蠲什二絢封還其揭富弼嘆曰真縣令也載諸簡策至今膾炙人口君之政足以追配劉公宜民感之深而思之切也用記君治績俾勒諸石非直以慰吾民之思亦使來代者有所警悟而觀法也君名璽字國信山東青城人庚戌進士

長子縣修城記

劉龍

潞有屬邑曰長子新築城完鄉校生薛大川輩以邑人



頽於保障偉其侯之績不忘遣使來請書其事予坐使  
者問狀焉曰城其高乎曰城故高二丈多頽圯弗稱今  
崇爲三丈益其厚於崇爲三之一雉其顛爲六之一曰  
塹其深乎曰塹故深數尺多堦爲平地今浚二丈濶稱  
之延袤可六里增其舊殆二百步旣城矣城之五門四  
闕其上故有樓又恢拓而新之增置舖舍凡十有九旣  
塹矣塹於五門各造懸橋以通往來有警撤而去之告  
諸當道發公藏之羨費不及民董以主簿楊君春典史  
惠君熊邑之耆年高明王釗諸人亦分領其役吾邑城  
厚完自趙襄子之徙發之今之城由古之城也曰爾侯

潞安府志

卷三十二

藝文續

十

勞乎曰侯親程土物揣厚薄曰巡而拊勉之曰茲吾職  
也吾不能已曰爾民怨乎曰吾民赴役如歸市見侯曰  
勤于巡也遮而謝曰是吾圉也敢不竭力從事副我侯  
保障之意侯忘其勢民忘其勞閱三月告成蓋量工命  
日不愆于素也子聞而訝之曰有是哉侯之能使其民  
有道乎役莫勞于土功城邑尤勞君子重於役民城邑  
尤重故嘗結之以信乘之以時使夫民知其所不得已  
然後可耳登邱之呼齊桓不竟其工棄甲之侮華元亦  
失其對而挾詐秦兵之襲亦無救於梁社之墟非其信  
未孚時未可而強驅之以力故邪在易中孚之九二鶴



鳴在陰其子和之言以信感也是而感民其孰不應解之上六公用射隼于高墉之上獲之無不利言以時動也是而動民其孰不獲聞侯之治邑嚴而不苛寬而不縱省民若取其有愛力若出諸身真猶父母愛子民愛之亦猶其父母然茲非其信與方盜起齊魯侯已欲城咸曰之迂已而澤潞戒嚴侯卽督民兵禦之境上賊不敢犯旣去乃大城之當其時長子之民危于累卵直以侯力而保始服侯之先見而謂其城之已後也茲非其時與以信以時而後勞此之謂善用其民雖然君之保障以城猶其具也有所以城之卽不城尤足以恃若前

潞安府志

卷三十一 藝文續

七

日群盜聞風引去長子無虞是也具焉而已雖城成畏也前日群盜鼓行而西太行失險是也詩不云乎佻人維藩大師維垣謂所以安且固不在彼而在此也史侯能城又庶乎所以城者予復敢贊焉亦無俾城懷云爾

長子縣鄉賢祠記畧

孫紹祖

鄉賢祠祠其鄉之賢人也賢者祠之不肖者觀焉往者祠之來者觀焉所以風民也長子於晉號多賢古矣而未有祠弗祠則弗觀有司之責也華陰史侯治長子三年而民懷而政成而蠹平化行乃爰及城城葺及祠焉祠於漢鮑宣於後魏堯暄李業興於宋子貞宋道和



孝中王恭王士綱國朝任教阮勤有數昭不濫也其位  
列窮達不一昭無方也或以學或以行或以德業昭足  
徵也位序一以世代後先而勢分不與焉昭鄉義也主  
以木昭古也祀事孔明春秋以時莫敢廢焉君子謂史  
侯于是乎有禮長子之民於是乎有觀也已

侯壁村重修大禹廟記

申章邑人

潞城縣東去八十里許有里曰侯壁居民聚處七十餘  
家村中建大禹廟世傳村西漳水壅塞鯀始治之開鑿  
山渠向南潞流高不能下禹疏東流始通里民獲安遂  
建廟祀考漳水出自長子發鳩山經潞城而下衡漳之

潞安府志

卷三十一 藝文續

七

績載在禹貢世所傳者非無因也廟創始無文可稽我  
朝正神號曰神禹夏后氏之神登載祀典正德辛巳里  
人劉仲實等視其傾頽之甚集村衆而論之捐資爲倡  
擇勤厚者司其事里人爭出所有不百日而厥功告成  
正殿五楹東西各五楹中建樂樓前設重門圍以墻垣  
飾以金碧煥然一新因礮石爲碑屬予文以絕其事予  
因述禹之功以語之曰禹之功天賴以成地賴以平人  
賴以生所謂盛德百世者也伊昔洪水氾濫下巢上窟  
民患極矣賴禹盡疏鑿之功九河順四隩宅然後人得  
平土而居之當時天下之民得免洪水之患者固禹之



功且古及今天下之民永免洪水之患者亦禹之功也後之君子尙克念之崇其廟祀血食無窮則報本之道其庶幾矣是爲記

黎城縣重修學宮記

呂 柟

甲申孟秋予自涉過黎黎尹楊侯舜卿作學宮且落成予姻文君宗顏司訓於斯往訪焉登明倫堂度架木猶綢繆未謝不可坐乃覲於私第明日黎士子蠲堂開宴以速予師尹咸在酢醕旣舉徘徊瞻眺仰見群棟穹窿如蛟騰而鳳起東爲日新齋五楹西爲時習齋五楹文行忠信之號皆背齋而設幾二三十楹且其北倚白巖

潞安府志

卷三十一

藝文續

三

南臨衡漳東達蒼溪而石竚嵐麓積布馬鞍諸山亦皆自西環拱信可謂據黎之勝矣有鐵筆在簷下降視之鏘楊侯所撰上梁文也文用駢儷體有華藻其鼓舞振作之意不啻飢渴侯語予曰斯地不甲科者今六十餘年矣往時堂在大成殿後掩蔽旣甚頹陋亦久良臣竊意其咎出于此也乃東徙於茲然方落成而吾涇野子至涇野子素高科良臣所望於黎士子者其兆乎予曰嗟乎奚有于是夫黎古名邦也自被文王之化而豫馮鮑緒皆此上黨之才且今趙初隱于蒼溪王修身廬于墓場其諸浴德藻行之士更欲遍踪乎嚮之益阜稷契



而無餽孔門區區一科第何足爲黎士子望乎子旣抵  
解之三月副憲王端溪巡歷至黎楊侯請之曰日者良  
臣之作學也涇野子有數語于良臣心終不忘欲問記  
可乎端溪子曰懿舉也乃即使宗顏及其徒李謙來涇  
野子曰柘無以益黎士子黎士子惟追踪乎嚮之益皐  
稷契輩而不愧孔門符楊侯作學之志而後已乎楊侯  
卽墨世家文行俱茂屢屈春官其爲政慈廉而又有設  
施故其作學勤懇亦不費民財力云學完在是年秋九  
月

壺關縣重修文廟學宮記

呂柘

潞安府志

卷三十一

藝文續

古

三原張君益之子年友也旣爲壺關痛士子之弗振也  
乃於文廟學宮次第葺理咸登完美復創建名宦鄉賢  
之祠立城中及村落社學三所而又督之以規課示之  
以前箴士皆彬彬然向進異時邑鮮科第自君至後壬  
午舉三人乙酉舉一人且連舉丙戌進士選爲翰林吉  
士皆此邑百餘年所少有者也於是壺關人士感君無  
已且謂君治壺關於其民撫善懲姦慈諒嚴果並行不  
悖有古循吏風乃遂以學記來請嗟乎壺關潞之隸邑  
也而靜林紫圍之秀麥積羊腸之奇雲梯榭林十八盤  
之險皆諸邑所無則亦群山之會而淑氣之萃乎其爲



顯者三老茂忠於漢左相苗晉卿盛於唐元帥任志父子節於元太子賓客杜敷暨夫狀元郭翀並重於明初英哲繼聞遠過黎潞豈其盡得高深之助哉則亦上之人有作之者耳今茲壺關蓋非異時矣其後之興者殆必藹藹多士上下不可以媚天子庶人者乎夫物理無盡責在思身以爲知道路無窮貴在定心以爲行若乃化出無常志存有恒則又諸士子所大進於古之人者是吾張子所深欲也宣聖殿重修者五楹廡及重門亦皆煥新豆籩簋簋改造琉璃爵俎爐鎔錫爲之饌堂號舍罔不申飭工始嘉靖癸未之春落成甲申之秋董其潞安府志

卷三十一 藝文續

五

役者陰陽訓術閭恩協以相成者縣丞張經主簿徐環典史吳淮教諭胡淵訓導張銓上官楷法皆當書

東山書院記

呂 柟

東山在潞州東南七十里雄山鄉卽俗所謂東嶺也仇氏時茂森族居於此時茂自其父祖及見時濟楫輩與其子孫立家範以同居者蓋四世矣又常修舉藍田呂氏鄉約以化鄉人者蓋三百餘人矣興建義學於其舍傍以教鄉之子弟者蓋五七十家矣猶以爲未也乃於雄山之東巔建書院焉平其嶺巘實其礎壑爲方四畝甃石爲基崇丈有五尺圍六十餘丈其上繚以甃甃以



爲周垣於其內先建先師廟三楹其後爲學習堂三楹  
主教者居焉齋四日志道據德依仁游藝在堂之前相  
對列其廟之前則建入德門門南構樓崇丈有五尺以  
儲古今典籍曰尊經樓樓下前額則題曰東山書院云  
樓之北井厨碾臼碑亭皆左右列其南也廂屋共六楹  
以居園丁田卒有橋突起於其前下爲橫池凡東山之  
水皆趨聚焉實入門之始途也曰格心橋院外西北置  
田五十畝煤窑一座則以供春秋燻盛及有事於書院  
者之用斯役也蓋三年而後成倡之者雖時茂而經營  
創作則時淳朴有專任焉往予在解時已記之矣至是

時閑欄以前規之未詳也乃奉時淳及時表桓之命披  
風霜冒波濤渡江而南以再問涇野子曰夫書院自唐  
宋以來白鹿嶽麓處處有之蓋以禪學校也然其後多  
課諸生文藝科第而於朱子舊規鮮有舉也夫東山書  
院之建其無止以伸帖畢工辭華而已或曰何以爲規  
曰卽家範以教家而家道皆可正矣卽鄉約以教鄉而  
鄉俗皆可美矣卽義學以教子弟而子弟皆可才矣蓋  
先師夫子及諸賢之道實不外此士能如此雖以治天  
下邦國有餘也又謂時閑日子博學而篤行恬於世利  
而厚於倫理真石巖之處士也望卽於此設科以待鄉



之俊秀而教育之明先聖之道爲邦人之式無爲厚自  
遂也慎之哉書院之設人將以爾爲標準也仇氏而不  
能慎終如始則斯書院雖近世之課藝文科第者不逮  
而况其他乎

長子縣重修城泖畧

趙時春 翰林

大明有天下寢海內之兵而衽席之不復試用者百五  
十餘年鋒銳銷城郭隳賢士大夫雍容揖遜聲名文物  
庶幾五帝三王之盛矣亡何流寇竊發支黨延蔓被於  
山東西河南北之境小邑破滅大都入保至興邊兵征  
討之卒就梟夷而蒼生之禍慘矣當是時忠臣勇士束

潞安府志

卷三十二 藝文續

七

手受害莫能誰何譬如持千金之資而不操利兵以  
爲之衛其不爲盜竊而去者幾希唐山進士王君密爲  
長子令旣輯收其民又以不虞爲戒乃衷其衆力滙其  
財植經其役賦取其城之澆脆者藝鞏之痺最者豐崇  
之地覆者完合之封之以瓦石域之以溝洫樹之以蒲  
柳守之以樓櫓懸風戰格睥睨之具不旬月而稱完督  
其役者縣丞鄒相主簿杜永泰董其事者省祭官王劍  
輩慕誼助餉以成厥功者致仕官宋錫李相教官王卿  
輩也王君之用心可謂勤矣今世之儒者要言地利不  
知人和形勢雖強以仁義爲本余今不然夫闕門之禮



不可用之于夾谷之會章甫之服不可衣之于過宋之時仁義和會可以治民不可以待寇捍患古之君子鳴玉而佩劍代結繩以刀筆易巢居以城郭鑄金芟木毀革蕤羽以爲五兵之衛得其旨矣余旣深嘉王君之心又因其邑人薛君大川之請薛君亦廉能吏故不違其請而爲之記因併著余說

遊紫團山記

栗應宏

嘉靖戊子秋七月予東遊紫團山自五龍信宿而至道路窈窕穿林木而上者幾十里及慈雲寺有僧數人邀予觀元人三十六景詩碣在墻根岻岻然散且缺矣由

潞安府志

卷三十二

藝文續

六

慈雲石磴硤屈攀巖而下者復幾里則袤然福地爲雲蓋寺山勢四壁巉兀盤繞諸峯挺峙競秀而變形望之鬱然葱葱西連王屋東俯林慮諸山南北相拱帶騁青蓮白泉之勝斯爲太行樞要也乃抵寺憩數日山僧導予遊循石徑南渡溪由東峯入屏山遮地卽爲參園已墾爲田畝久矣歷西筆峯緣石而出時藥物纍纍然幽香沓至復西轉觀瀑布淙淙成流卽采藥坐石濯足飲泉而歸復數日山僧言西峯石局予忻然從之盤條覓步陟兩峯間其地磐夷可屋許予意宜置石室記刻于此忽飄風颯至西望大谷煙冥蒼翠泉聲泠泠幽禽聞



作予愕然久之知卽所謂瀑布者邊峯峙立此得徑觀焉迺左右顧盼百景俱美神爽而氣逸飄飄然有丹臺石室之想峯巔峭峻間有爽局覆松焉北轉觀磨崖碑旁數石孔僧云舊有招涼亭于此復有故咸平閣餘趾至則臺砌頽沒基礎相枕藉斷柱石已俱撲于水中惟蓬籬繞匝牛羊棲之而已如昔人詩所云者多不可得予然後慨然嘆曰悲夫鑿山石壘土剡木彼固以爲無窮之觀而山川獨乃如此草木種種得在醫籙若所謂經營一時傑然酬適于此中者今則惡覩其爲誰雖與之俱朽亦異矣悲夫沒世之懼吾安得不重有感于斯

潞安府志

卷三十二

藝文續

九

遊也乎

潞安府記

唐 龍

潞安府者改潞州而爲府也民用乂焉境用戢焉巡按御史姜子潤身行郡至於斯曰潞其治矣紀治以文而不可以已也乃以屬諸不敏惟潞古上黨郡也距百餘里則青羊山拔而峙焉中多沃土蔚林農稼樵芻托之而處但強悍亦每竊伏憑恃險阻叢慝犯禁聚則攘臂以剽鄉村散則影匿罔受捕逮嘉靖戊子守臣陳其罪狀加之以兵多所失至合三路之師然後底平之績奏焉皇上以德化民聿務安輯於是命兵科都給事中今



陞大宗伯夏公言勸處其事公祇奉德意其至也取各  
功若罪而甄別之尤是咨是度曰潞地勝可府青羊人  
野可縣府與縣相維而糾以兵備重臣斯盜賊解其姦  
而無或後虞也遂疏以請詔稱可錫府名以潞安內附  
以長治縣青羊置縣曰平順兵備涖府若縣以按察司  
副使領其職是皆安之而已夫非平盜之難而無以安  
之之爲患潞之盜擊平之矣而青羊阻自若也王峽虹  
梯猶蠹蠹也然崑險結則獷戾生洞穴盤則逃亡集兵  
散斯玩玩斯萌萌斯滋滋斯擾而其憂豈遂已邪於是  
控之以府以厚專城之托厥秩重矣臨之以縣以廣親

潞安府志

卷三十一

藝文續

三

民之任厥勢近矣秩重則易馭勢近則易結而又有專  
道之使修軍防焉明法軌焉布戒令焉狗鼠之徒其姦  
自無所蔽而或有觸法者禁則止縛則至磨則散折箠  
制之而有餘矣而又何盜之憂昔漢渤海歲多盜乃選  
二千石以治之乃劍頓息而教化行是故今日急急於  
郡邑而增設之也而被是選者果能奉職循理不驅民  
於饑寒而惟務厚其本業以足其衣食則人知榮辱雖  
賞之使竊赧然而不從焉此則安之之本也惟良有司  
盍慎求之



天下之事利於目前者未爲利而利於久遠者始爲利  
目前之利救弊之爲也久遠之利善後之圖也救弊者  
事或易成善後者其功難泯是固委任才力之致然非  
苟且僥倖之可及者且天之生物各具所利而人每欲  
各利其利此其情也然皆不能如其利焉其勢則有然  
者是必待人而始遂也利必待人而興亦必得人而久  
久於其利者是爲久於其道者也故曰利者義之和也  
利貞久於其道也天地之道恒久而不已也其必守常  
而能知變量勢而能度時識物理之已得事機之會斯  
可以久利於民而爲利之大也潞爲州治舊矣地險而  
潞安府志

卷三十二

藝文續

三

民悍物饒而俗強距省五百餘里民悍乘險則志恃而  
易馳物饒俗強則人梗而難化加以人事之乖舛青羊  
之盜勢使之也閔然群起操挺爲兵據險爲穴出沒爲  
害連及旁郡有司旋視不可撲滅動兵兩省至來王師  
渠黨雖勦絕而費亦不貲矣事平皇上軫念民瘼爰命  
今大宗伯夏公來撫勘經畧時爲兵科都給事中攬轡  
入境民隱宛然指顧中矣至則別自其功罪酌量其賞  
罰貧者有賑傷者有恤民心大悅境內以和公乃屬其  
官僚耆老詢其盜之所招若曰弭盜固一時之利曷保  
其常利乎夫民御失其道則乖遠其法則玩顧茲強郡



立郡維州則權輕而難於息強去省維遠則民乖而易於失御無督乎民之窮且盜也經曰窮則變變則通通則久是不可無處矣爰協衆謀擬改州治爲府青羊村爲縣相地攸宜立玉峽虹梯關者二花園口魯般壑穿橋等堡者三礮溪峯玉斗崖白雲谷巡檢司三青羊則開設儒學附郭則併於府校郡制旣崇須兵鎮重必得憲職嚴督武備掣回本郡民壯用振軍爲計度改作工料之需咸仍其舊而就其有不更張不重出以事勞繁亦因其利而利之也崇制足以服強悍武威足以消姦宄教養有學譏察有關巡詰有役備侮有堡新治之具

潞安府志

卷三十一

藝文續

三

揆擬咸備議定疏請皇上嘉允親酒宸翰錫名府曰潞安縣附郭曰長治青羊曰平順悉如所擬張官團兵山右屹然增一大郡民庶安業士習絃誦風俗丕變盜難復作僉曰是舉也得通變利民之宜合天地恒久之道其利大矣仰戴聖明及遠之仁緬維夏公經理之勛吾民固有不能忘者請書之石以垂長永然春秋之法凡大典作有益於人國者則書惟茲大事信宜書之以告後之司戎司牧者毋事隳墜恒悉新制以其永圖云

創建平順縣記

顧鼎臣

天地生萬物物極則殺之生陽也殺陰也殺亦生也人



君生萬民民不軌則殺之生仁也殺義也殺所以爲生也其道一也是故明君治天下法天地之道握生殺之機以成仁義之能垂衣高拱而四海晏然紹統歷業百姓賴利焉潞安府之青羊山蟠居衍迤幾二百里巖岫巉巖壑谷深窈迴巒疊嶂長林叢薄屏翳阨塞四方亡命往往竄匿其中且水土湍悍而風氣溼鬱生人多尠頑獷戾兼之隔離官府無有持尺箠挾寸刃憑陵而誰何者賊首陳卿父子世濟暴惡糾集逋亡脅誘蚩愚禦行旅掠村堡焚蕩屋廬擄刈人民有司務掩害養亂者二十餘年嘉靖戊子巡撫都察院右僉都御史常道始潞安府志

卷三十一

藝文續

三

宣露逆節請討之既而謀議不常操縱無狀賊勢益猖獗天子震怒命將出師復調集山西河南山東官民兵會勦閱數月然後平之捷聞今少傅兼太子太師禮部尙書武英殿大學士桂洲夏公時爲兵科都給事中請簡命素持風裁給事中一人往覈功罪并區處地方事宜以弭後患上俞之卽以委公公至則宣皇澤申國憲別淑慝明賞罰洗刷污穢振撫創殘人心大愜以和公親履賊巢周視山川歷陟要害歎曰賊之弗戢形勢使然非建縣設命吏以彈壓之難免後虞僉以爲然乃咨詢相度得吉地曰青羊村者林巒盤紆形局軒豁且據



諸山之堂與可以整制四表公諭於衆曰非斯地不可  
會巡撫都察院右僉都御史王君應鵬暨藩臬諸司群  
謀協同乃議割潞城縣所轄地一丁六里壺關縣十里  
黎城縣五里共割地方三十一里以爲新縣版圖凡一  
切計慮纖悉罔不周詳抗疏陳便上報可因錫縣名曰  
平順命下有司鑑往圖新翕然作而行之召史繪圖辯  
方定位鳩集工徒卜吉以從事因山爲城因城爲隍延  
袤方二里許闢東南二門構橋通道宅城之中近北建  
縣治繚以崇墉冠以麗譙門屏廳廡庫藏廨宇土地祠  
吏舍監房小大畢具陰陽醫學旌善二亭咸置於大門

潞安府志

卷三十一

藝文續

三

七

之外其他若儒學僧道會司倉廩舖舍教場養濟院城  
隍廟山川社稷風雲雷雨邑厲諸壇察院司府公館凡  
治民事神造士賦政之區準舊規備今制咸極一時之  
觀又設玉斗崖蟠溪峯白雲谷巡檢司三玉峽虹梯關  
二剗治險隘以爲通衢八蓋於禦暴已亂保障之備特  
加詳焉經始於嘉靖八年九月望日告成於嘉靖十二  
年二月朔日凡財用取給於公家力役則僱募亂後餘  
民而他府州縣毫分不預焉蓋事之始終經營規畫悉  
出公一心之存而巡撫藩臬諸君贊相以成之然非聖  
天子倚任忠賢勿貳勿疑其何能盡嘉謨以暨此瑰偉



之績哉抑斯舉也人足以勝天理足以制氣是使釋隘  
甫定之民寧茲新邑養父母保家室長子孫永去危亡  
之禍而享太平之福其功不亦大哉夫當賊之被滅也  
天誅之行止於元惡而脅從汚染非持宥其死命且容  
養匡翼務爲千百年之圖是殺之之意何其薄而生之  
之意何其厚義之裁制何其精而仁之覆宥何其廣也  
亦猶天地之殺物於窮冬纔旬朔爾而生養成遂乃歷  
春夏秋三時焉是雖一事之微而聖天子裁成輔相傾  
否爲泰以嘉靖萬邦者宏謨遠畧從可識矣少傅公今  
日密勿機務躬成治理以垂名於竹帛亦於是乎基之  
潞安府志

卷三十二

藝文續

五

江西右布政使李君崧祥昔以按察司兵備副使嘗預  
謨議舉職守思惟一時政令之大不可無紀也特走狀  
京師徵予文將刻諸石以昭示無極義不可辭乃爲術  
其梗槩云爾若夫經費工徒規制度數大小諸司從事  
名氏之詳不遑殫書令刻諸碑陰

創建平順縣儒學記

徐元祉

秦州人

縣學者縣立一學教民之子聖王所以風天下者也按  
古制小子有造出就外傳家塾黨庠術序皆謂之鄉學  
鄉學有秀異者移之小學諸侯歲貢小學之異於天子  
之大學鄉學者今之社學也太學者今之固學也小學



者今之縣州府學也何以風天下耶今夫自鄉而少而  
太盡乎地矣盡乎地則盡乎人矣盡乎人則風之不既  
盡乎載觀天下之氣必有爲之先者而鼓之則莫神於  
風故颺颺颺颺莫知所從颺颺颺颺莫知所被颺颺颺  
颺莫喻所終其德與故其入深其機微故其稱隱殆不  
疾速不行至所過化所存神者乎夫惟入而深稱而隱  
也故物之和祥乖異各以類應性隨之矣故是先王知  
風之神也知風之自也於是候音以節風陳詩以觀風  
音者風之聲也詩者風之形也卽音可以知詩卽詩可  
以知政卽政可以知俗卽俗可以知性卽性可以知風

潞安府志

卷三十一

藝文類

風

於是彰美而瘴惡湔澆而培淳迺和而剗乖然後化行  
也故聖人得之爲春風賢人得之爲先風君子得之爲  
德風其曰風味言乎詠也其曰風制言乎工也其曰風  
行言乎捷也其曰風動言乎變也此學爲聖王風天下  
之具而天下自有不容不偃焉者亦審矣抑孰造之隨  
上黨天高太行地勝堅者屹屹遂者鬱鬱直者律律橫  
者翼翼蛟龍之淵虎豹之藪中有野人者靈名而蠢行  
茂林脫葉無風自舞不聞天子之風而潢池之膽斗矣  
有傷風化聲動北甌一鼓而平之賴今賢相桂洲夏公  
都諫時之力疏上允下厥縣建焉其他事之顛末道之



興廢議之優劣勸之巨細人之安危治之隆替逐詳於  
李頤一太史之筆石不復出也繁斯縣造則斯學造矣  
尾之者誰舍弟梅亭元道拜令之五紀經營之艱難綱  
繆之歷履鼓舞多方勸懲惟則始有者少有之少有者  
富有之於是撤朽剝蝕植頽築虛鍛甄堊木凸凹完獻  
齒創爲先師殿明倫堂各五楹兩廡各七楹兩齋啟聖  
鄉賢宰牲射圃學倉神庫神厨各三楹號房共二十楹  
教諭訓導宅共三十楹先師等門等龕等碑各八座敬  
一等亭太平等坊各二座置造柙板爵燈釧簋簋邊豆  
樽筐卓爐盤臺等祭器共七百一件置買經史律誥典  
潞安府志

卷三十二

藝文續

三

考鑑要錄記禮志等書籍共四百一十六冊造於某日  
考於某日財不專帑力不妨耕故人不厭而不覺其有  
是也迨今風氣漸開人文漸著拔之鄉而登之國者多  
且務本攸宜幽風載詠一或劍而不犢者望風解也會  
司教李子天民楊子龍集賢鄉牛鎮上舍中朝用王仲  
銘王濟美茂才王蓋臣李鏗王廷瑞諸豪傑咸有風乎  
舞雩之志丐予一言以垂不朽曰邑簿李子鸞草稿者  
也王子大同伐石者也始終有勸風力可嘉督工則邑  
典周斌聞風而振也偕有與焉予文思荒落久疎筆硯  
宜無所謂言者第情懇莫辭又不忍以同氣之避彼



焉耳故纂其槩以風之烏敢云記

夏公生祠記

李時

嘉靖六年冬潞之青羊山劇盜陳卿以亡命阻險吏浸不能制晉之撫臣諭之弗悛威之弗下已而師徒撓敗仍執命吏全晉之地震恐訛言流於京師謀議蠶起天子重用兵且以事難遙度遣兵科給事中今少傅大學士桂州夏公往相事宜公乘傳至潞遵廟謨設方畧調兵食蒐才請審形勢官軍四集一鼓焚其巢盜失險自縛青羊絕險也衆謂兵不能入旣捷始服公之料敵制勝炳於幾先云於時將領之勇怯吏治之嚴最財賦之

潞安府志

卷三十二

藝文續

天

盈縮功賞之高下公一一裁之莫不詮敘精核敷奏詳明天子悉從公議公又議建邑以安其餘黨衆頗難之公曰寇雖平險未夷茲罔遁逃藪也數十年後必有據之以爲亂者夫人情欲治而失其所以治惡危而亡其所以危青羊地險民悍苟不因而縣之害未已也矧不一勞者不久逸不暫費者不永寧吾請任其役奏上天子復嘉而從之開縣治焉於是剪草萊爲公府夷窟宅爲闐闐易劍戟爲鋤犁剗壁壘爲城隍化呻吟爲謳歌上命其邑曰平順夫茲土之方亂也公平之其甫定也公安之此國家萬年之慮而平順百世之澤也所謂尸



而祝之社而稷之非公誰先耶乃相與卽文廟之巽隅  
創爲祠宇小祠公於中以爲無忘公德夫公之籌斯邑  
也以圖民安耳非責其後也民心之繫於公也亦初未  
嘗與公期也蓋世享其利則事不謀而勸人襲其愛故  
役不督而成民豈有求於公而公豈有望於民哉所謂  
以義起以信孚也祠之制內外爲門各三楹翼以左右  
應各六楹中爲堂祠公而其制特崇楹亦三焉驅我虎  
豹奠我井邑綏我父母長我子孫以永我俎豆此邑人  
之志也嗚呼休哉昔在唐世李趙郡公絳之揣魏博李  
贇皇公德裕之料澤潞凡設策夾機無不立酌文武功  
勲高出近古青羊之績稜諸二公其多讓哉公茲方以  
忠言嘉猷仰贊聖明內安中國外制四譯宏濟蒼生而  
無所私澤建大功立顯名鏤諸金石而書於竹帛蓋未  
艾也青羊特公之微者耳前山西按察副使李君崧祥  
亦有事於建治者也知公之偉績爲詳因請記於余余  
故樂爲之記以慰其邑人

襄垣重修昭澤王廟記

郝良臣 邑人

嘉靖辛卯秋九月重修昭澤王廟成首事者徵文予予  
不文緣躬覲其槩遂弗敢辭按縣志王爲唐異人以秘  
術宏濟時艱民賴以生沒之日民用不忘維是有廟廟



在縣之離方歷唐季五代宋元暨我明一統世不廢祀  
正殿五楹歷歲頗久漸以棟撓於是焦當王斌崔景然  
郭宏寬黃公庭史繼郭才盛黃堯臣郭宏澤輩率顛有  
衆飭材鳩工始事事焉又募於邑厥應如響既備乃布  
尋累堂疏牖壯闔丹雘采漆方栴圖棖實實枚枚孔曼  
且頌起春三月壬辰止九月戊戌凡二十有一旬乃襄  
其事既落成觀者堵進爭擊羊豕雉魚執醴醢寓信辭  
伐鼓嘯籥虔潔踞奠以告厥成功維昔聖賢嶺在祀籍  
纔可屈指間或以殖或以平或以序或以勤或以寬或  
以文皆鑿鑿可考是皆功鉅驗遠故越在異世鬱有馨

潞安府志

卷三十一

藝文續

三

香人心翼戴饗報不已被禮樂而崇儀章擬於生者吾  
王術妙當世捍禦薦多而默感冥通越世尤甚視前數  
聖賢雖考履殊祥亦要均之潤下而奇流不可謂非水  
也則今究安宅以引以長實分所以誰口有可隆替哉  
雖然廢興成毀物數則然旣剝而復旣夫爲始消息無  
停天行之則物數象之矣廢興成毀相尋無窮耳目屢  
遷誰能爲一今諸君有是舉也則固爲興爲成爲數之  
更爲時之復爲事之夬爲耳目之一新頌不可優嘉也  
乎恐其相尋之數無窮也故復敢望如諸君者於千百  
世焉是爲記



襄垣縣劉侯修城記

劉龍

予自留都得謝還里邑者王祝等來謁曰吾邑城自漢州劉侯築完垂二十年闔邑賴以寧宇維侯之澤不敢忘也請爲紀之以志我思予嘉是役久矣茲家居乃獲身庇固樂爲道之按邑城傳自趙襄子始築故號襄垣舊城在甘水北唐武德中復置韓州築城甘水之南天會間盜起鄰邑多陷邑宰韓俊才傑士也大爲戰守之計顧城微且隘不足恃增築外城且戰且築賊不敢逼城皆以去今所居者是也國朝景泰間邑宰甯侯智成化間邑宰劉侯牙相繼修築皆不忘百姓之患時稱其

潞安府志

卷三十一 藝文續

三

賢正德間西河山東流賊大擾城以歲久頽敝民皆危懼卧不帖席時潞州劉侯明宰邑躬閱城池曰是惡足與民守哉乃以農隙戒事經營規畫悉有良法庶民子來不假鞭朴逾月百雉皆興周六里高二丈厚稱之城上之塗可行大車邑城之良無以加此潞州以疾故任邱趙侯承淳繼至爲設女堞以終其事雖有潢池之弄在將之警不足虞矣潞州之政甚與民宜而明敏殊絕人不敢欺修城之役若出緒餘今相去已遠民猶德之不忘且礪石以紀其績日見城如見潞州城居一日卽漢州一日之賜使久於其任爲民造福將有過於古之



循吏者惜哉不竟其施徒使斯民思之不已時移事改猶諄諄乎言之不置也近商河賈侯樞新葺四門門上各欲建樓會遷秩去今昌邑葛侯縉下車屬有警報視城上女堞弗稱及城樓闕者卽趣合修完益爲雄壯亦可謂急於民患矣

長子縣徐公祠堂紀畧

馮 鎬 邑人

九峻先生卒于官漳父老涕泣而思之遂列狀詣當路請曰徐侯循良吏漳人不忍忘欲建祠以永思報可于是卜地城東南隅爲室三楹繚以門墻中設像祀之經始嘉靖己亥秋越歲而告成門人馮鎬記之曰公治漳潞安府志

卷三十一

藝文續

三

之政如拒權貴之請辭殺兄之寃革淫祀之靡祛師巫之感剗吏胥之奸節婚喪之後振士習之隋息桴鼓之警哀孤獨之窮人盡知之矣公豫之偃城人也弱冠舉省闈遊大復空同之門其所爲詩文皆漢魏以上語器宇嚴邃制行修潔灑然超脫尤愛佳山水每遇風景月夕輒偕予五六輩探漳源登慈嶺至則流觴賦詩歡譁終日把酒浩歌若無宦情性嗜書畫尤工草隸書得其片簡隻字不啻拱璧且貌莊言寡公庭無筵步疾呼人望之儼然若神卒之日漳人無老少賢不肖哭之如喪考妣彼高車駟馬烜赫一時身死而名泯誠視此千載



而下仰其遺容莫不感慨肅拜曰此徐府君也亦孰得哉

壺關縣重修縣城記

張鐸

嘉靖庚子秋八月賊寇西鄙肆貪婪也擄掠無厭越辛丑壬寅連歲大舉上黨震驚皇赫斯怒事下廷議核功罪擇官守集兵糧增堡寨禦戎安民曲爲之所歲癸卯寇騎窺伺不敢復逞廟謨淵塞民始有寧宇矣先期雲坡李侯以甲第銓吾壺邑首值多事憂形於色謂城匪堅胡守財匪勸胡營弗守其能邑乎孰爲富而好禮以相予城凡禮勸若干人董厥役爰及中產各展其

潞安府志

卷三十一

藝文續

三

物乃擴舊基甃以磚石城之上外雉內墉可騎可輿令出惟行逾年而城完言言崇墉惟壺賴之侯志斯擇其僚佐相與伐堅珉紀成事辱不鄙顧遺鐸而委重焉人亦有言曰邑介山阻壑井泉孔艱卽寇至出入汲爨胡所於利矧巨役重費於舊貫何子曰不然常變時也重輕勢也審勢以權事通變以濟時斯圖難於始而貽休於終古之人不務歡虞不求近功凡以此也惟思患預防事事有備今欲以防寇缺然無備若曰寇曷至胡容役民以叢怨容容史史僥倖於萬一毋乃玩勢廢時而溺人於難乎且財者民之心也恩者怨之府也以其財



治其事任事任怨有司之責也吾聞之爲而不恃成而不居侯聲實懋昭且夕遷去異時有警民或以干城頌遠大之政恩義在人侯弗計也詩曰赳赳武夫公侯干城言得民也又曰訐謨定命遠猶辰告言得政也諸向義者分役於公損資廢時他日尙當有崇獎以勵後人法皆當書紀於石碑有考焉侯名用敬字仲學號雲坡辛丑進士青州之益都人

平政樓記

程紳

夫詩稱羔羊之風禮言游息之義故君子在公綜紀庶務退食則思興化理凡所以益民物而禪治功者無不

潞安府志

卷三十三

藝文續

三

庸心焉予自己亥秋淮任長治值縣制新建多所未備乃於署禁倉廩咸加增益時歲豐民安境內無事凡所調度不擾於民平政之道恒以爲念也近因宅後曠地建樓三楹取古人平政之言退思之意命之曰平政樓焉自公之暇時一宴習非止於觀被氛遠眺望而已也凡事務之衆可者當興否者當革宜者以爲法不宜者以爲禁思所以輯民而平政者行之旣久爰有所孚亦於此而有得也若夫覽山川之勝臨風景之美花開命酌吏散鳴琴境謐時和與民偕樂亦斯樓之餘致也後之君子其尙念之哉



重修關聖帝廟記

劉龍

余觀古人處世使其名傳諸不朽靈爽常存千古一日出於人心之所追慕弗容已者大槩有三曰立德曰立言曰立功然非有先後次第也所遭不同而所立因之有異焉耳德見於操修言形於議論功著於施爲皆有裨世教足爲千古法程由是感於人心而廟祀興矣廟祀之興不踰三者焄蒿悽愴洋洋如在所謂不朽斯其至矣若聖帝廟祀始以立功爲不朽之尤者乎凡廟祀各止其所或於桑梓或於履歷非泛然無因也故其所及亦有數而不能廣惟帝之廟祀則異於是京師有之

潞安府志

卷三十一

藝文續

三

藩省有之材落有之其有之者又不止於一王公貴人下及編民之家率揭其遺像尊禮之多不嫌於泛泛不以爲淫帝何以得此於人哉則功之立有裨於世教也漢有天下且四百年歷世久矣流澤深也比其季也三綱淪九法斁一時草竊之徒稱帝稱王赫然自以爲得志無何而覆宗絕祀不啻飛鳥之餘音雲煙之過目世皆唾詈之不置矧有爲之廟祀者耶今帝夫世若此其遠屋而祀之俎豆而薦之僕僕焉而亟拜之彼豈嘗按帝之風度聆其警欬哉帝知有漢室盡臣子之職而已豈計其身後之享一至於此所期秉彝如舊曠世而相



屬者非歟昭烈以中山之裔奮起蠶叢之墟君臣戮力  
誓圖興復帝雄武號萬人敵樊之役威震華夏魏議遷  
都以避其鋒向使江東犄角同爲翊戴祀漢配天不失  
舊物特反掌間耳乃甘心委命助桀淪盟遂成曹氏之  
篡雖才如孔明竟以孤立無與飲恨渭濱天不祚漢謂  
之何哉春秋之法以討賊復仇爲大義帝素好左氏春  
秋諷頌不輟日擊時事固大法所難容者興復之志堅  
如金石相國厚遇示以用我若可從也而王室之賊吾  
惡得從敵國求婚示以親我若可許也而王室之仇吾  
惡得許惟鞠躬盡瘁死而後已者是與焉帝之功禪於

潞安府志

卷三十一

藝文續

三

世教彰彰較著血食之盛傳諸不朽有由然也又惡得  
以成敗論人物哉襄垣縣治之東南百武許有帝廟不  
知建自何代據舊記永樂間重修迄今垂二百禩頽敝  
弗稱過者惕然興感屬歲事屢熟民用又康耆老李文  
全王漳等相與勸募修葺泉貨總至市地拓基增廣殿  
宇諸制咸敝煥乎壯麗視舊殆將倍蓰踰年而後落成  
謁予爲記因書帝之所以不朽者俾勒諸石嘉靖二十  
四年歲次乙巳八月望後穀旦

重修摩雲寺梵宇記

張鐸

陰陽結秀列崧岑以鎮四方山川出雲興雨澤而成萬



物地藏靈異載昔生輝天啟如來於茲作宅鑑羣生之  
苦難悽若于心開普濟于見聞爰露其耳層巒寄聽半  
樓定裏之聲幻質忘言盡化岡頭之石不緣縑衆衣鉢  
曷傳匪拓琳宮經像焉麗粵惟佛嶺秀出壺關視地無  
垠與天爲黨蕭蕭陰壑悲風生六月之秋鬱鬱喬林慧  
日照三春之雪纖塵不到飄香露以溶溶絕頂難扳見  
祥雲之靄靄若爲登百仞之嶠遂將眇萬井之區信潞  
境之俱瞻大行之支秀也伊予讀禮之暇亦嘗往造其  
巔六念未消徒羨招提之勝三循欲去爭如清淨之緣  
偶逢僧話倫浮生半日之閒睠彼法輪贊聖世萬年之  
潞安府志

卷三十一

藝文續

七

承於時老衲法號圓澄戒行超群譚空入妙茹冰咽蘂  
蚤暮無愆伐鼓撞鍾晨昏不爽高山仰止拜遺像以增  
悲梁木其頽入空堂而太息乃誓億兆爰用咨詢以歲  
癸卯十一月二十八吉辰募徒伐木召匠掄材鼎建阿  
彌之堂面啟觀音之洞鍾樓兌峙石雉離雄輪奐一新  
香火畢集相茲神地奠我民人神妥而民斯安地靈而  
人益傑聽沙門之妙偈期共登仁壽之途睹梵宇之宏  
開知各效涓埃之力紀名書費衆志聿興鑿石摘文人  
代可攷吾鄉勝蹟來高人景仰之詞千古名山著今日  
表章之義時嘉靖乙巳仲春之吉



吳興太守張公壺產也壺之鄙多山修亘萃鬱戟時障  
列草堂一區鳳凰麗其陽樂祠鎮其陰佛耳表其西南  
鸞山迤其西北沃壤衍拓可田而食豐樹翳合可蔭而  
息平望有松亭檜結氤氳翠重者山之西林也公昔摧  
茅治榛爰構精舍以處陳圖列史分藝考則揚純儒之  
素言究聖哲之元德人傑地靈連舉嘉靖丙戌科進士  
空冀之群爲時偉器由翰林吉士累官出守湖州敦化  
醇俗士欽其德民樂其惠公顧身被纓綬心慕泉石不  
以出而忘處進而忘退乃介陸給諫槩屬作西林草堂

潞安府志

卷三十一

藝文續

表

之記噫達哉公聲績茂著登陟未艾退處非其時也顧  
乃興懷舊業不溺於仕其視今之從宦者以官爲家周  
計所歸亦遠不侔矣西林有八景別述贊於後其陰森  
秀翹雜見丹碧雲烟之所出入光景之所照耀朝夕四  
時之所更代惟公以虛襟高度領畧於元冲之表未可  
紀也公他年功成讓能賜老其中治蔬灌園出所藏書  
訓子若孫或置酒高會與西林之逸人投壺彈琴無所  
不樂者是西林也於公之藏修可以方李供奉之匡廬  
范文王之長白於公之引退可以方裴晉國之綠野可  
馬溫公之獨樂園地以人勝將播傳海內雖與四公



美夫何過哉歌曰晉之墟兮壺之曲山合沓兮水涵蓄  
敞荆扉兮葺蘿屋中有人兮發其藏揚蘭芬兮耀龍光  
懷舊樓兮不能忘桂樹兮何檀檀霜霰下兮夕以寒美  
人歸來兮樂千萬年

西林自製草堂記

張鐸 邑人

西林者何以地號也堂者何學舍也何言乎草堂西林  
靜以成學結茅林麓示幽寂也何記乎原堂之成以足  
志也既已人或議之曰西林子以弱冠登甲科達而敏  
優於政矣不思貶損行權以階廡仕乃抗直忤時避恩  
歛怨卒釀浮議而墮危機年當彊仕爲明時所擯棄卽

潞安府志

卷三十二 藝文續

三

優游城郭與士大夫晤處猶足以滄往宣來釋毀延譽  
曾是弗思顧戀戀草堂獨行爲潔自信彌篤茲其爲志  
不已隘而其爲計不亦左乎西林聞而解之曰夫志以  
嗜彰行由分定故饜芹怡暄者惟其適卽物起興存乎  
感倬彼草堂可以約身心可以豁性天環顧林巒圖書  
出焉對越墳典師友寓焉塵鞅不繫鉛槧日親起予者  
西林草堂也易曰利幽人之貞君子以上棟下宇堂之  
時義大矣哉故以草堂隘西林者昧乎分以西林張大  
草堂者惑於志西林旣爲草堂而復摛詞記之匪草堂  
能重西林西林媚草堂也西林匪媚草堂學以自媚



於志而發於草堂也西林謂誰壺關山人張鐸也

壺關縣重修文廟記

張 鐸

吾邑先師孔子廟創自元季宣德間緣舊修飭迨今又百二十禩矣中雖數更圯墁僅支傾圮嘉靖戊申夏六月段侯涖止觀廟宇之就頽也喟然興懷亟圖作新時以用匱民疲日事摧會歲己酉春三月適監察按部至面咨計宜遂伐官木若干徵府若縣移帑銀若干於時遴董任僦徒傭築基惟崇掄材孔良凡宿斃舊穩無所於用不六閱月別故易新煥然改觀戟門兩廡以次就序猗與闕宮固數十百年規也事旣竣學諭王君宸學

潞安府志

卷三十二

藝文續

四

訓韓君昇薛君東儒暨庠生楊瀾張時敏栗善繼輩相與徵記於予予作而嘆曰務因循者憚締構樂簡易者厭經久一切目前之政斐非所以爲訓也故致力於神者畧則敷政於民者苟焉而已矧崇功報本化理用基時祀月謁制典攸重而顧以敬儉此瑣從事漫不加省是褻廟貌爲虛位忘紳冕所自出也侯斯役也知先務矣由是而肅穆對越以致如在之誠崇祀以宣教新廟以作人裨絃誦日奮髦俊彙征壺之人文當有不昭於異時者奕奕新廟茲實肇之而况博士弟子員職皆祇奉明禋翁受教事長日周旋庠序得無琢詞以紀成與



予昔爲諸生時登降於斯以侑以獻目擊蕪陋恒慄慄然冀有請也辱諸君之命乃今嘉樂成功有羨心焉大易與飭蠱春秋書屋壞良以進能而警情也莫爲之述後將奚徵因漫識歲月如左侯名錦字美中別號二泉丁未進士東郡之恩縣人是舉也固政教之一端云

襄垣趙氏貞烈記

王宗稷 邑人

烈婦趙氏王應春妻也嘉靖癸丑應春爲祖母喪不能舉稱貸以葬弗克償遂自縊趙氏欲殉之其姑防之甚密三日後趙氏托爲炊暗持刀刎頸於房中濺血滿地須臾而絕時年二十三也聞者哀之邑侯馬公具儀往

潞安府志

卷三十二

藝文續

聖

奠卽日合葬於城西之原予曰烈哉是婦也夫人孰不好生而惡死則死一難爲臣死君爲子死父爲婦死夫一死而三綱舉則死而善道爲尤難昔吾邑豫讓爲智伯報讐五舉不中自刎於橋下固有此烈丈夫今趙氏從夫而終一醮不改遂自刎於室中非一烈婦人乎可見吾邑風氣未漓習俗尙淳後人所當則倣者也惡乎可辭願執筆而書之付其兄趙天孟刻石於墓以識天地之正氣云

襄垣縣修城隍廟記

郝良臣

城隍廟之設自我國朝郡縣區夏卽各建祠宇以敘列



百神制也予邑之有廟與營作之次第前人載記詳矣  
顧其制尙多簡陋未足以展祀安神其後稍稍增葺漸  
備如後寢如兩廡如前之作樂樓如旁之神厨道院之  
類皆作者非一人成者非一時於時前殿之捲棚與亭  
與坊則猶闕如也今年春隣廟鄉民王斌等切念之乃  
僉謀畢詣虔告於神而事事焉首各捐貲若干以爲木  
斃瓦石之儼邑人應者如響於是五材畢集百工協奮  
審曲面勢計日成之建捲棚三楹不施墻牖噲噲焉畧  
如今官府之疊室東西碑亭二座則稍殺於棚之制以  
附麗阼階坊牌二楹則內準門之大小外量衢之廣狹  
潞安府志

卷三十二

藝文續

聖

而施等焉飭以丹黝崇以陶甃赫赫濯濯秩然備矣起  
嘉靖乙卯二月止六月凡十有二月乃襄其事王斌等  
走使南京徵予文紀諸石郝氏良臣曰神依人而血食  
人依神以怙冒隱顯相維合一無二者也故儼在祀籍  
纔可屈指大而經帶具瞻則河海岳瀆焉散而正名民  
財則山林川澤焉而百貨所生則丘陵墳衍焉蓋莫不  
蒐之理典國祀祀之以社以方隨時饗之豈直有所私  
徼哉誠心之不可已也况城隍朝廷勅命之神與牧令  
陰陽表裏者也司彰善癉惡之柄有禦災捍患之功禦  
捍以濟變仁也彰癉以行權義也仁以經之義以律之



仁義不忘民之主矣其人之竭誠翼載不約而同夫豈其心之不可以已歟然則王斌之與闔邑等畢力殫財增拓其所未備者顧非義起之禮也乎是爲記

紀二館人

一稱庖人一稱宰人

王世貞

余守比部時見南來人道任兵憲環館人事奇之兵憲始丞吳時倭暴至臺檄丞以鄉兵百勦之兵故市人子倉卒應募不習戰遇賊輒鳥獸散走而丞方獨身從親信抵射賊賊中勇敢者奮持大刀踰溝來擊丞館人挾抱丞上馬丞上馬則賊已刀尾之館人乃直前手搏賊連中數槍手不舍竟死丞以聞得逸去余使二輔遇韓

潞安府志

卷三十一

藝文續

三

戶部叔陽亦稱其館人云始韓以金華令入覲過淮陰改陸車麟麟從冰上行也已冰薄車破之韓與館人俱溺焉館人急持韓衣裾不置會旁有施繩鈎下救者緝且及館人號曰左被髮而溷爲令救令有重賞救者乃移緝鈎令起宛轉間竟失館人弗及矣余聞而悲其事問二人姓名俱不得以爲恨嗚呼士居平誦讀詩書信矚目掀鼻昂頰鼓掌稱仗節者何限一旦事起而抱首也亦死生之際深矣夫二館人鄙人耳豈有師友講義之素其死亦豈以是爲名哉倉卒顛沛之際達其一念



容已者而已夫達其所不容已而其容乃意有所  
辨則豈爲徒死哉

任公平倭紀事

周八龍

復庵任公名環字應乾山西長治人也以嘉靖二十三年進士又九年爲蘇郡丞側儻正諒廉武仁恕其蒞事皆以衷誠篤之不以市名人謂煦煦專爲惠公蓋任心而行明年壬子閏三月始以倭警聞時承平久兵猝起遠近震駭公率衆禦之寶山洋衛尉張治以甲士五十前鋒殺賊一人或橫刺之墮衆潰走公叱止之不得曰士未調民不可責以死明日又出獨前搏賊賊愕不敢

潞安府志

卷三十二

藝文續

四

動相守數日賊潛遁去追之不及四月又犯太倉蔡中丞亟奔命然士望風走乃入城守適有飛語蔡遂如蘇檄公討之付兵三百皆新募公厲以必死無旋踵不入與家人訣爲書付之而行親介胄臨陣士以公激之無敢不從特賊鋒銳甚勢不敵屢戰嘗縮然賊亦憚不敢肆公躡之隨所向設拒敵衣芒屨與士襍行濡雨際晷黑無休舍被草間嚼糲飲水同勞苦且喻勉以古義烈事故士遂歸心於公死生之矣賊潛出沒公夜追之出其前後宰夫佩欲免公嘗衣公衣介馬而馳故賊不知所取公嘗墜溝中賊過之不知匿至明士始跡得又遇



之矢連集士以死悍公亦被傷士昇之趨濱水梁已撤  
丈餘超而過追急佩留禦之死焉乃免公已求得其元  
爲流涕親酌之屬公疾猶強力起巡壘衆憐公壯氣或  
上其壯使者檄公歸郡七月賊蕭顯等陷上海白吳淞  
出洋中戈船要之不得前以五百人據南沙又檄公率  
解明道兵往擊適新冠至衆盛相與守之至十二月命  
將湯克寬來討湯雖世將驕敵士僑玉又不相申驅之  
入賊伏中而敗失亡千人公恨湯不足與儀真兵覆沒  
長兵利鏃皆爲賊得藉以攻我督將萬表又遇之敗失  
狼藉勢遂大張民逃避無所號呼震野焚掠慘不可勝

潞安府志

卷三十一

藝文續

望

門不敢啟擁塞蹂踐乘墀者望之而嘆攀緣上者又絕  
絕而墮公適還自儀真日柰何坐視之縱有覘謀我在  
何患身自坐辟門令男女以列進且察之賊聞竊入卽  
傳訊駭以爲神累日所活蓋數萬人復以解明道兵出  
疾力戰賊退入太湖吳江兵用舡艦邀之乃棄所獲餌  
我因得逸出平望去公又以功進秩參藩復視事甲寅  
正月陷崇明復由平望入公以沙上兵列沮洳欲截之  
不克會吳江守已固遂去四月柘林賊復犯縣境按使  
者周公如斗移檄公合募府調集彭氏苗夷及守林公  
懋舉督俞大猷等諸軍夾擊之盛墩斬三千級又合丞



魯公桴等擊之泖湖斬七十三級賊始大挫五月又一  
支突至郡分爲二一從陸抄掠一入太湖公追之急賊  
復入川瀆恣其忿然爲我所扼不得逞由常熟去在柘  
林者復來陸涇幕府又移公合諸師搗之戰始交獲其  
舟三明日賊復揚幡直上公以夷兵鏖之壩上自辰至  
申賊披靡斬首八百幾殲焉六月餘賊二千又自崑山  
至郡城下公以解明道兵與戰敗之又有至平望者公  
急往據盛墩乘之浙兵亦至賊遂絕跡去而公以奉諱  
亟徒跣歸居喪摧毀過甚又以前奮不顧身蒙犯矢刃  
傷痕遍體疾大作亡何卒郡人聞而巷哭私相與俎豆

潞安府志

卷三十二

藝文續

吳

之者衆使者乃上其壯得請爲祠郡內額以褒忠歲時  
祀守親涖夫以公聲烈卽質之典制勞定國死勤事捍  
灾禦患皆兼有之矣嘗聞公居家孝友發自天性遇家  
人極義恩嫺戚黨族無不敦恤至行孚備卽自喪其親  
而毀迄不自全以不逮養爲戚則其誠仁可知一旦起  
儒生當事變惟忠國衛民安全之圖臨危忘死盡節官  
下豈有意富貴舍不貴之重竊冀非望耶誠激以大義  
厲死綏之志雖得全亦非始所料將帥之臣平居自詭  
立功名及與公同赴敵皆失措色死灰矣公勇氣方倍  
從容麾之則豈常情所能矯厲哉若城下之役開門延



則城社與百萬衆繫之公決策納外入者膽智之人  
也矣余時親見傷殘者慄不安公出涕相接親爲裏創  
士卒最下者皆與通飲食古稱不乘騎不張蓋投醪分  
少絕甘士不就頓不先休公特不足言也其功在國社  
名在簡竹恩在東南諸郡邑而蘇尤被公澤深余於公  
之禦寇始卒又親所覩記并得之所傳聞亦甚核閱二  
十餘年爲萬歷甲戌蜡直載之書不以文

襄垣縣均糧記

郝良臣

吾邑自國初時里額八十有三糧額夏麥七千七百二  
十八石有奇外其春鹵不堪蘆蓑者實三之二有司復

潞安府志

卷三十一

藝文續

七

不與酌減往往取盈焉於是官之所徵者恒浮於歲之  
所獲年復一年而民之遺負逃竄者日急且多宣廟時  
父老籲於朝下監司勘驗乃分爲二項凡流民遺棄之  
田則任民佃種名曰拋荒卽半徵數也凡居民常種之  
田則仍舊起辦名曰本身卽全徵數也由是上不費於  
催科下不苦於輸納逃者漸以復荒田漸以墾而糧亦  
足以待辦至武廟時或有令復徵所蠲者吾邑溢出額  
外之糧五百四十石有奇會慶陽張公來牧檢知嘆曰  
拋荒免科本爲厚下也今茲復徵之無乃給民以自貳  
乎於是按邑中起科之田而攤前所謂溢出之數每石



二八算徵名曰均攤浮佃卽哀多益寡之遺意也是後  
法久弊生富豪之家重賄里書巧爲飛詭致令全甲混  
淆鬼域難辦而邑之有識者徒以切齒噴目矣嘉靖丙  
辰我昌黎王公以妙齡登制科奉命來尹吾邑徧詢疾  
苦真知前弊乃昕夕憂惶思所救正因獲一二黠胥鞫  
訊之凡均攤馬免影射於各家者始得其梗槩而其間  
猶有曲爲掩護恣吝不肯承伏者公研究益力百方鉤  
索雖合勺之微必有端委而後矣戊午秋始復舊額而  
竣焉昔先正邱文莊公欲除兼併之患立貢獻之法後  
竟格於不行今我公不二載而刷清累年之弊其有光  
潞安府志

卷三十二

藝文續

吳

於文莊不淺矣時予遷官方岳被放西歸適邑博白趙  
君與諸庠生徵予爲記予不文顧均糧一節雖學士大  
夫嘗苦於包賠者皆重沐膏澤滿滌虧累不獨子惠困  
窮已也予援筆數語亦以附異時自碑之萬一併查司  
實徵條欵俱別著於碑陰云公諱尙直字舉之松坡其  
別號也

壺關縣重修廟學記

宿 椿

壺關地形高聳群峯環合其民儉其俗淳來牧者率多  
英俊之士政行化洽靡不自興學校始壺之有學自趙  
宋時始廟與學並建迨我明稽古建學教養士庶洪武



初呂侯士安視前傾圯始增修焉繼是者如馬侯與輩  
雖世代不同而崇祀重本之意未始不同迨嘉靖丁未  
段侯以進士擢宰是邑釋奠孔廟環視木腐瓦摧乃裕  
財鳩工絢彩輪奐一時改觀其廡與諸學舍謀畫已周  
方圖修葺值部檄徵風憲之選自是再繼者急於簿書  
未暇綜理比己未歲覃懷何侯登第首銓茲土蒞政之  
初遂以興學育材爲急務仰視殿成孔安獨於他所未  
及不無缺畧之嘆於是重修明倫堂五楹及大門儀門  
二座棟宇翬飛煥然爲新復闢儀門外地創立啟聖祠  
以鄉賢名宦二祠舊寄附鳳書院春秋供祀未便於是  
潞安府志

卷三十二

藝文續

巽

改建學宮設主於中望之莫不起敬齋號廡舍基址已  
定至於聖製敬一亭創建雖久猶欲廓大其規模何侯  
丁外艱戒行其所未備者獨不有待於後乎於是邑丞  
李侯時用倅武侯相相與贊襄乃借教諭劉君承芳訓  
導國君壽馬君體雲庠生牛繼先張鳳梧任應翔楊承  
勛樂于從事走書徵文樁不工不敢沒善方今皇上敦  
敘彝倫崇奉祀典天下共仰文明之化何侯乃能崇廟  
建學激勸人材有以祇承真可謂賢有司矣爲有司知  
重學校爲生徒宜知作養互相砥礪以求無負崇建之  
意始見懿獻致道狎敏諸賢迺然傑出相與贊化端不



有賴於斯耶段侯錦恩縣人何侯永慶懷慶人俱進士是爲記

襄垣縣展修文廟學宮記

郝良臣

嘉靖壬戌懷進士湛泉蕭公受命來尹茲土居二載政始成乃謀修學宮因廟謁集諸儒於講堂命之曰凡廟學之在天下恒必擇靈區粵壤又多規制宏深者非以侈觀望也蓋廟以奉祭祀學以育才賢譬之於人必正衣冠尊瞻視然後可以彌人之媿慢起人之敬畏今廟學雖設然隘於陌巷區位湫逼垣墉短淺甚不足以展妥侑鳴教鐸以發舒多士之氣也吾將爲子濶新之何

潞安府志

卷三十二

藝文續

三

如衆喜曰諾適學田歲有得乃市材先事廟工賈民舍改街衢縱展共十丈有奇其橫展皆稱縱又選鄉民之良實者曰王斌郝其保郭宏恩趙朝以董課之功未半湛泉以年滿陞秩去是歲冬適大梁進士節齋李公來繼之蒞政初卽興舉百廢尤先注意廟學且詢知前功所以遂止者由費不足卽先捐俸金若干兩又倡寮友及學官諸生邑士大夫闔境義民各相輸助特應者如響不旬日得三百餘金乃分布衆役計日程工修正殿五楹併修東西廡內外門廟街左右兩坊及啟聖名宦鄉賢諸祠宇共計五十餘楹又置泮橋一座皆飾以蒼



禮院綠垣枚枚實實視昔之戶不蔽影大相雲泥乃  
遂發築學宮縱展橫展之度皆與廟長廣相埒其門堂  
戶塾亦無不中矩矧者歲丁卯爲隆慶改元始竣事於  
是節齋公暨二三寮佐及學師諸君來徵文予不文顧  
所言公則當公言之何可以不文默也惟國家以武定  
天下而以文守之故兩京有監郡縣有學至於窮荒絕  
域皆知尊崇孔子之道赫赫濯濯亘古所未有也故常  
於守令考最陟明必以興教育材爲第一蓋文事興則  
六事舉矣詩曰愷悌君子令德來教言有文事也今食  
人之祿而荷人之爵能以文事爲首事者幾人哉自我  
潞安府志

卷三十二

藝文續

至

公踵成蕭公之美如璧照珠聯焜燿先後不將愧凡令  
之鯁曠者耶有開必先者二公之烈也希之則是者吾  
人之貴也他日多士出而有爲必尊主庇民事功赫奕  
斯有光展修之役矣乃若鶩於紛華惑於寵利則方朝  
三暮四幼學壯行之不侔矣斯不負二公盛心哉是爲  
記

襄垣重修城隍廟兩廊碑

郝良臣

城隍廟殿代有繼修兩廊則歲久頽敝近年尤甚鄉民  
王斌郝奇寶楊天祥等不替初心力圖全美乃先捐已  
貲爲倡道士粟太坤復募諸邑人財既集將事事適某



氏子市木百枝皆疎直堪用於是督率工徒以畚以築以繩以削簷阿是經棟宇是飾功將半而財匱太坤愀然嘆曰安所得物以完斯役矣乎明日斲土獲銀器十三件重七十餘兩器宇所造實唐之至德年所遺也

舊文

作劉宋之至德年按劉宋並無至德年號至德唐肅宗紀元也易之

衆禱於神再市物補

所未逮由是建東西廊各十楹中三楹各稍崇祀六曹祿命諸神像墉宇相瞰實實枚枚與廟殿程度相稱觀者無不悚嘆焉是役起嘉靖癸亥之三月成于甲子之八月夫禮有不得而殺事有不得而廢譬之官府焉堂粵尊矣瞻視具矣而廨舍未備吏無寧宇主官者可以

潞安府志

卷三十二

藝文續

五

獨安乎繇是觀之則廊序不可無亦猶吏舍之不可闕也大小相雜體統自然而已矣况惟先蔽志詢謀僉同鬼神其依地不愛寶孰謂諸鳩首者徒以災木石爾耶神之顯赫固不係于祠屋之有無獨吾人嚮往之不足者非祠屋則無以致其至也聞其烈尙能以感人况拜其祠而親炙之者耶今諸君之建是功也隆必不可殺之禮興必不可廢之事而又盡已盡人以盡於神而致吾人嚮往之所不足斯其所以可記也

潞城令楊公祠記

溫如璋

潞城故有楊公祠予按視三晉屯政已乃訪各郡邑



官因悉楊公祠故於是亟命改葺云夫今時守令喜  
聲美祠且徧郡邑故方直之士悞不舉天下祠而  
蓋之若楊公祠則予葺恐不麗且永蓋誠爲祠真也  
名盈字守謙山東人也號曰雙溪吏潞城三年以  
憂去一年中復兩遇豪暴上官以私繫立位施政者僅  
三年所然去之日邑父老多號泣送已乃祠焉夫在昔  
稱良吏去思如召杜輩書傳不多見然其人率久治若  
楊公才三年豈不爲難哉今世祠者往往出自營陽  
曰聽民而陰主之末則能得上官驩心或有顯拔乃其  
邑豪猾者憚違希意捐建焉故率身去而祠毀扁怨而  
潞安府志

卷三十二

藝文續

三

府讞祠若此類者僞耳若楊公不得安位卽欲自營所  
不暇然其去也以憂又身多坎壈則邑人相率祠也豈  
更有所爲哉予嘗考其祠無記夫使豪猾者僞爲之必  
記然弗記也故父老輩樸實狀祇欲肖其像可羅拜不  
知所謂文具耳予以此心重之恨不得爲之狀已而按  
部至雲中會其子東江君巡撫雲中因索公壙志覽焉  
志所載潞城事爲多諸善政大者無慮數十總之性慝  
直其政公察廉正一意爲百姓不顧忤上蓋古張京兆  
楊伯起之儔也予於是知潞民祠公出心慕因又嘆正  
德間吏多實政下以實感蓋庶幾淳遂之風乃益促葺



祠令速完焉庶幾延公芳順潞城百姓心抑且以愧夫  
下官與民相欺爲僞祠者固非爲其子中丞君也

潞安府志

卷三十二

藝文續

七



